

【學泅水】徐姿華原作

僱一旦就當驚水，小學一年生該下，先生鼓勵大家學泅水，講泅水係當好個運動，身邊個好同學做下學會泅水哩，硬性個僱乜毋願輸人，轉去屋下就緊嚟¹阿媽講愛去學泅水。趕等暑假，阿媽同僱尋著一間溫水個游泳池，還問著名聲盡好個教練來教僱，過買一身靚靚個連身游泳衫分僱，鼓勵僱勇敢學泅水。

第一到去到游泳池，又驚又好。做好軟身運動，教練帶僱同另外四個學生仔練習沒水、學換氣，同僱兜一個一個拗入游泳池。佢兜乖乖聽教練個指示，同頭那沉²入水裡肚，僱嚇到胚命仔扳等游泳池脣、腳踇踇仔毋敢沾著水、抽骸另命、噉到目流鼻涕，像分人苦毒到當衰過樣仔；脣項個人做下緊看僱緊笑，教練緊拐僱，僱還係噉到抽骸、毋肯落水，高不將正喊阿媽同僱帶轉去。

該暗晡，阿爸軟聲勸話僱繼續去學泅水；阿媽就唉唉唧唧道嘆：「你毋去上課，學費就了忒哩，無好退！」阿哥也分享自家學泅水個經驗，還拿出佢盡愛惜個極樂仔講愛做僱學會泅水個獎

品。在大家個鼓勵之下，僱答應第二日愛過去上游泳課。

第二日朝晨，阿媽愛載僱去上游泳課，催了催僱還係啊啊奶奶³，這摸該摸毋肯停動。上課時間硬硬會赴毋著咧，阿媽發譴擊雞毛掃仔⁴愛修理僱，僱試著當委屈，又驚分阿媽打又驚去泅水，就噉到大嫲聲，歸條巷仔都聽到清清楚楚。鄰舍過來關心，知著僱係驚泅水正噉到恁大聲，做下忍等笑來鼓勵僱。就恁仔，該站時間，朝晨頭巷頭巷尾若係聽著僱又噉到噉噉滾⁵，就知該日僱又愛去上游泳課咧。

經過三禮拜個訓練，游泳課個同學一儕儕都學會泅咗，同學一陣換了一陣，僱還係手同腳配合毋著，手記得划咧腳又毋記得踢，實在毋得結煞。有一日，僱自家在該練習，毋多知仔手同腳嘎配合得著哩，泅有五公尺恁遠，心肝肚實在還歡喜哪！僱續等過練，緊練緊知得該要領，手腳較省力哩，圓身也緊來緊輕鬆，僱正第一擺感受著泅水個趣味。

感謝該當時，屋下人個鼓勵，分驚水個僱面對自家個困難去學泅水，分僱有機會去克服自家較軟弱個所在，這下個僱，毋單淨曉得泅水哩，也有信心去面对人生個各種挑戰。

¹ 嚟：音 kieu^ˇ；小孩子對大人有所要求的聲音或動作。

² 沉：音 ciim；因外力所致而被推入、沒入水中。

³ 啊啊奶奶：音 a^ˊ a^ˊ nai^ˊ nai^ˊ；懶懶散散、愛理不理的樣子。

⁴ 雞毛掃仔：音 gie^ˊ mo^ˊ so^ˊ e^ˊ；雞毛撻子。

⁵ 噉噉滾：音 ve ve gun^ˋ；不斷的大叫或大哭。

編號 5 號

【畜羊仔个叔公】羅瑞霞原作

吾公有兩兄弟，佢兜歇莊項，叔公歇在離莊頭無幾遠个石礮¹脣，叔公無討舖娘，一儕人歇在礮脣，畜十過條个羊仔。叔公講：「一儕人過日仔較自由，又毋使愁勞博激，逐日快快樂樂過日仔，幾好吔！」

佢從細就好遊遊野野，講著搞就一條線，毋過平常時，愛上課、讀書，一日到暗就係國語、數學、英文、社會、電腦，搵到佢舂頭磕額，頭暈腦疼，毋過一到放寮日，該就係吾个天下哩！

佢盡好去尋叔公寮，叔公个屋面前就係石礮，石礮脣有一大片个草坪，打早羊仔就在礮脣食草仔。佢見去到該位，係有看著羊仔在該食草，就會挑挑去逐該兜羊仔，總係同羊仔逐到咩～咩～緊叫，佢試著當生趣。該央時，叔公係在屋肚聽著羊仔叫，定著會行出來看，看著佢在該逐羊仔，就罵講：「孤盲牯，又在該逐羊仔咧！毋驚下二擺降个細人仔無屎屙。」

佢看著叔公出來，黏時喊一聲：「叔公，恁早！」叔公雖然會罵佢，毋過也盡惜佢，因為佢係屋下單單个孫仔。叔公笑面笑

面个行過來，緊行緊講：「羊仔肚屎枵吔在該食草仔，你莫撩佢，落來屋肚佢拿糖仔分你食。」講著有糖仔好食，這又七係佢好來叔公屋下个原因，叔公無家寶，一儕人歇，故所長透有好食个東西都會留起來，等寮日時節拿分佢食。

叔公雖然係一儕人歇，毋過屋下整理到淨淨俐俐，桌項無半點塵灰，完全看毋出佢係單身哥仔。佢識問過阿公，叔公仰會無討舖娘？阿公講：「頭擺叔公有熟識著一個歇在莊尾个細阿妹仔，該細妹仔生來麻筍麻筍，毋過異靚、異煞猛，兩儕感情也當好，兩家人也認定愛結親家咧。無想著有一日，該細妹仔在田肚做事，嘎分蛇哥咬著，該央時个醫藥毋發達，佢兜莊下堵著恁樣个事情，大部分都係自家尋青草仔捶捶貼貼啊，就好咧！哪會知，該細妹仔係分龜殼花咬著，無黏時送到街路去分西醫看，人嘎恁樣無忒吔。」該細妹仔無忒，對叔公个打擊當大，過後，叔公完全無愛摺其它个細妹仔相行，當多人愛同叔公做媒人，都分叔公拒絕忒，叔公就一儕人徙到礮脣去歇吔。

阿公講：「係有閒，你愛較輒啊去陪若叔公哦！」好啊！叔公恁惜佢，同佢做伴無問題啦！

¹ 石礮：音 sag bog；石隄。

編號 7 號

【大樹下】謝玉賢原作

記得佢還係細人仔个時節，屋面前有一條細河壩，河壩肚輒常會看著幾下隻鴨仔，在該泗上泗下，成時佢兜細人仔也會跳落水肚，同鴨仔共下搞水，你戇佢，佢戇你，搞到一身溼漉漉仔正轉屋。毋過，分佢印象最深个毋係該條細河壩，係河壩脣个該頭大樹。

該頭大樹，厥个名仔安到爛布樹，樹中央係空心个，毋過佢當耐命。逐年正開始熱，樹葉仔會跌到滿地泥，四叔就會蹶到樹頂，撈樹把¹剝到淨淨，毋使幾久，爛布樹又會綻筍，新樹把一支支仔，樹葉仔生到撈撈，大樹底下就係大家唱歌仔奈涼个好所在，也係細人仔搞寮个好地方。

大樹下長透坐一大堆个人，逐儕都擎等一支扇仔撥啊撥欸，在該打嘴鼓。人講「七個和尚八樣腔²」，下屋个阿真叔講厥俸仔愛做兵哩，愁到無結煞，愁佢做兵毋知會分人欺負無？愁到目汁強強會跌下來哩！上屋个叔姆，講厥妹仔下禮拜愛嫁人，喊大家

去分佢請，問大家兜人嫁妹仔有麼个俗無？愛砵男家頭麼个？葉把仔愛打幾多斤？扇仔愛喊麼儕拈？帶路雞愛幾多隻？雖然有一大堆个问题，毋過叔姆還係當歡喜，暢到牙西西仔³。吾姆也輸人毋輸陣，同大家講：「吾妹仔考著師專哩，等佢畢業就做得做先生，搵手賺錢哩！」大家你一句佢一句鬧熱煎煎仔⁴，有人愁也有人笑，實在異生趣。

大樹下，這片大人在該打嘴鼓，該片个細人仔也無聞到講毋得，細妹仔在大樹下搞份家啦，你做爺仔佢做哀，爛布子泰起來做跋鍊、石頭結起來做烘爐、樹葉仔做青菜、樹把截仔做篾仔，大家搞到盡歡喜；細俸仔就在該搞園人尋、打紙牌，有兜人搞玻璃珠仔，有兜人灌土狗仔。這兜綻剝頭⁵，逐個精善善仔⁶，看著一團鬆泥就知下背有土狗仔，七手八腳培泥、攪水、倒水，毋使幾久土狗仔就走出來哩，這陣細人仔長透搞到愛大人擎等竹修仔來尋正肯轉屋，實在異有好搞。

大樹下有佢當多个回憶，係隔壁鄰舍聯絡感情个所在，也係細人仔搞寮个地方。雖然童年離佢當遠哩，毋過童年个記憶還像昨晡日樣仔。該頭根深葉靚个爛布樹，就像係一支大大支个遮仔，保護佢兜行過艱難又辛苦个日仔，該頭堅韌又耐命个大樹，到這下還係佢回想人生个中心寄託。

¹ 樹把：音 su pa²；樹枝。

² 七個和尚八樣腔：音 qid² ge vo² song bad² iong kiong²；形容人多口雜，主張不一致，各有各的說法。

³ 牙西西仔：音 nga² xi² xi² e²；牙齒微露，輕鬆愉快的微笑。

⁴ 鬧熱煎煎仔：音 nau ngied jien² jien² e²；形容非常熱鬧的樣子。

⁵ 綻剝頭：音 can dog teu²；罵人頑皮鬼。

⁶ 精善善仔：音 jin² guag guag e²；精明的樣子。